



*Rhagoriaeth i bawb – Excellence for all*

Arolygiaeth Ei Mawrhydi dros Addysg  
a Hyfforddiant yng Nghymru

Her Majesty's Inspectorate  
for Education and Training in Wales

# Arweiniad atodol ar gyfer arolygwyr annibynnol ac ychwanegol

## Dysgwyr mwy abl a dawnus



BUDDSODDWR MEWN POBL  
INVESTOR IN PEOPLE



**Diben Estyn yw arolygu ansawdd a safonau mewn addysg a hyfforddiant yng Nghymru. Mae Estyn yn gyfrifol am arolygu:**

- ▲ ysgolion a safleoedd meithrin a gynhelir gan, neu sy'n cael arian gan awdurdodau lleol (ALLau);
- ▲ ysgolion cynradd;
- ▲ ysgolion uwchradd;
- ▲ ysgolion arbennig;
- ▲ unedau cyfeirio disgyblion;
- ▲ ysgolion annibynnol;
- ▲ addysg bellach;
- ▲ dysgu oedolion yn y gymuned;
- ▲ gwasanaethau cymorth ieuenctid;
- ▲ hyfforddiant gwaith ieuenctid a chymuned;
- ▲ ALLau;
- ▲ addysg a hyfforddiant athrawon;
- ▲ dysgu yn y gwaith;
- ▲ cwmnïau gyrfaoedd;
- ▲ dysgu troseddwy; ac
- ▲ elfennau addysg, arweiniad a hyfforddiant y rhaglenni hyfforddi a ariennir gan yr Adran Gwaith a Phensiynau.

Mae Estyn hefyd:

- ▲ yn rhoi cyngor ar ansawdd a safonau mewn addysg a hyfforddiant yng Nghymru i Gynulliad Cenedlaethol Cymru ac eraill; ac
- ▲ yn cyhoeddi achosion o arfer dda yn seiliedig ar dystiolaeth arolygu.

Cymerwyd pob rhagofal posibl i sicrhau bod y wybodaeth yn y ddogfen hon yn gywir adeg ei chyhoeddi. Dylid cyfeirio unrhyw ymholiadau neu sylwadau ynglŷn â'r ddogfen/cyhoeddiad hwn at:

Yr Adran Gyhoeddiadau

Estyn

Llys Angor

Heol Keen

Caerdydd

CF24 5JW neu drwy anfon e-bost at [cyhoeddiadau@estyn.gsi.gov.uk](mailto:cyhoeddiadau@estyn.gsi.gov.uk)

Mae'r cyhoeddiad hwn a chyhoeddiadau eraill gan Estyn ar gael ar ein gwefan:

[www.estyn.gov.uk](http://www.estyn.gov.uk)

**Cyfieithwyd y ddogfen hon gan Trosol (Saesneg i Gymraeg)**

**© Hawlfraint y Goron 2009: Gellir aildefnyddio'r adroddiad hwn yn ddi-dâl mewn unrhyw fformat neu gyfrwng ar yr amod y caiff ei aildefnyddio'n gywir ac na chaiff ei ddefnyddio mewn cyd-destun camarweiniol. Rhaid cydnabod y deunydd fel hawlfraint y Goron a rhaid nodi teitl y ddogfen/cyhoeddiad.**

<b>1</b>	<b>Cyflwyniad</b>	<b>1</b>
<b>2</b>	<b>Diffiniad o ddysgwyr mwy abl a dawnus</b>	<b>1</b>
<b>3</b>	<b>Nodweddion dysgwyr mwy abl a dawnus</b>	<b>2</b>
<b>4</b>	<b>Llinellau ymholi defnyddiol</b>	<b>3</b>
<b>5</b>	<b>Cyfeiriadau</b>	<b>5</b>



## 1 Cyflwyniad

- 1 Nod Llywodraeth Cynulliad Cymru yw sicrhau bod pob dysgwr yn cael y dechrau gorau mewn bywyd gyda chyfleoedd ac anogaeth i gyflawni eu potensial dysgu llawn. Ym mis Mai 2008 cyhoeddodd Llywodraeth Cynulliad Cymru set o Safonau Ansawdd<sup>1</sup> i gefnogi ysgolion ac awdurdodau lleol i ddiwallu anghenion dysgwyr mwy abl a dawnus.
- 2 Mae'r Arweiniad Atodol hwn ar gyfer arolygwyr annibynnol ac ychwanegol yn darparu gwybodaeth i gynorthwyo wrth arolygu safonau a darpariaeth ar gyfer dysgwyr mwy abl a dawnus rhwng 3 ac 19 oed yng Nghymru.
- 3 Yn yr arweiniad hwn, cyfeirir at leoliadau ar gyfer y Cyfnod Sylfaen, ysgolion cynradd, uwchradd ac arbennig ac UC Dau fel darparwyr. Defnyddir y term ymarferwr i gynnwys athrawon, hyfforddwyr a staff cymorth dysgu.

## 2 Diffiniad o ddysgwyr mwy abl a dawnus

- 4 Nid oes unrhyw ddiffiniad cytûn o ddysgwyr a fyddai fel arfer yn cael eu cydnabod fel dysgwyr mwy abl. Yng Nghymru, defnyddir y term 'mwy abl a dawnus' i ddisgrifio dysgwyr sydd angen cyfleoedd i gyfoethogi ac ymestyn sy'n mynd y tu hwnt i'r rheiny a ddarperir ar gyfer y garfan gyffredinol o ddysgwyr.
- 5 Gellir ystyried bod tua 20 y cant o ddysgwyr rhwng 3 ac 19 oed yn fwy abl, tra bo'r ddau y cant uchaf yn cael eu hystyried yn eithriadol o abl. Mae ystod eang o rinweddau, nodweddion a phrosesau yn cyfrannu at botensial a chyflawniad uchel. Mae'r term 'mwy abl a dawnus' yn cynnwys dysgwyr sy'n fwy abl ar draws pynciau yn y cwricwlwm, yn ogystal â'r dysgwyr hynny sy'n dangos dawn mewn un maes penodol neu fwy, fel cerddoriaeth, chwaraeon a drama.
- 6 Mae'n bwysig cydnabod bod nodi dysgwyr mwy abl a dawnus wedi'i gysylltu â'u cyddestun, waeth sut mae'r dysgwyr hyn yn cymharu â dysgwyr mwy abl a dawnus mewn darparwyr eraill. Mae hyn yn golygu y dylech ddisgwyl canfod grŵp o ddysgwyr ym mhob darparwr y nodwyd eu bod yn fwy abl a dawnus, yn ogystal â darpariaeth addas ar gyfer eu datblygiad trwy ehangder a dyfnder eu profiadau a'u gweithgareddau dysgu.
- 7 Mae gallu a dawn yn gallu amlygu eu hunain mewn llawer o ffyrdd, er enghraifft, dysgwyr sy'n mynd yn gyflym iawn trwy gerrig milltir cynnar neu'r rheiny sy'n dysgu medrau newydd yn hawdd gydag ychydig iawn o ailadrodd ac atgyfnerthu. Gall galluoedd a doniau dysgwyr ddatblygu dros gyfnod hefyd. Gallai rhai dysgwyr fod yn ddatblygwyr hwyr neu fod angen y cyfleoedd a ddarperir gan amgylchedd dysgu sy'n cyfoethogi arnynt er mwyn darganfod yr hyn y maent yn gallu ei wneud. Dylech fod yn ymwybodol y gallai anfodlonrwydd neu ddiffyg hoffter rhai dysgwyr o gydymffurfio guddio eu gallu uchel, tra gallai doniau rhai dysgwyr mwy abl a dawnus fod mewn meysydd datblygu anghonfensiynol.

<sup>1</sup> Cylchlythyr Arweiniad Cyflawni'r Her Rhif 006/2008 Llywodraeth Cynulliad Cymru

- 8 Ffenomenau datblygiadol yw gallu uchel a dawn, sy'n gallu amrywio dros gyfnod. Gallai rhai dysgwyr fod yn fwy abl a dawnus ar adeg benodol yn eu datblygiad, ond peidio â pharhau felly'n barhaol. Yn ychwanegol, mae dysgwyr mwy abl a dawnus yn cael trafferth â rhai o'r medrau sy'n cael eu gwerthfawrogi fwyaf, er enghraifft, darllen, ond mae ganddynt gryfderau serch hynny mewn deallusrwydd neu ddoniau penodol fel cerddoriaeth, celf a chwaraeon.
- 9 Er bod angen profiadau dysgu estynedig ar ddysgwyr mwy abl a dawnus i gyrraedd eu potensial llawn, gall darparu cwricwlwm cyfoethocach wella ansawdd y dysgu a gwella'r safonau ar gyfer dysgwyr o **bob** gallu a dawn. Felly, bydd trefnu darpariaeth i ddiwallu anghenion dysgwyr mwy abl a dawnus o fudd i bob dysgwr, ac yn rhoi cyfleoedd ac anogaeth iddynt gyflawni eu potensial dysgu llawn.

### 3 Nodweddion dysgwyr mwy abl a dawnus

- 10 Gallai fod yn ddefnyddiol i chi ymglyfarwyddo â'r wybodaeth sydd wedi'i chynnwys yn 'Cwricwlwm o gyfle: datblygu potensial yn berfformiad' a gyhoeddwyd gan Lywodraeth Cynulliad Cymru. Mae'r wybodaeth hon yn cynnwys rhestrau gwirio cyffredinol a rhai sy'n benodol i bwnc sy'n amlinellu ystod o rinweddau i helpu nodi dysgwyr mwy abl a dawnus. Yn benodol, mae'r cyhoeddiad yn amlinellu ystod o rinweddau bras a ddangosir yn aml gan ddysgwyr mwy abl a dawnus mewn meysydd dysgu ac agweddau ar draws y cwricwlwm, fel:
- meddu ar wybodaeth gyffredinol eang; maent yn aml yn gwybod mwy na'r athro, ac yn gweld y cyfeirlyfrau arferol yn arwynebol;
  - dangos mewnwelediad da i berthynas achos ac effaith;
  - amgyffred egwyddorion gwaelodol yn hawdd, ac angen yr esboniad lleiaf;
  - gwneud cyffredinoliadau yn gyflym a dethol y pwyntiau perthnasol o ddeunydd cymhleth;
  - dangos chwilfrydedd eithriadol ac eisiau gwybod pam yn gyson; a
  - bod yn sylwgar wrth drafod cymhellion, anghenion a breuder<sup>2</sup> pobl.
- 11 Er ei bod yn annhebygol y byddai dysgwr mwy abl a dawnus yn portreadu pob un o'r rhinweddau a nodir yn yr arweiniad, gallai llawer o ddysgwyr arddangos nifer o'r nodweddion hyn.

<sup>2</sup> Cwricwlwm o gyfle: datblygu potensial yn berfformiad 2003 Llywodraeth Cynulliad Cymru

## 4 Llinellau ymholi defnyddiol

- 12 Dylech ddisgwyl gweld bod darparwyr yn ymestyn ehangder a dyfnder y gwaith ar gyfer dysgwyr mwy abl a dawnus, yn ogystal â darparu cyfleoedd ar gyfer dysgu annibynnol. Yn y gorffennol, roedd y ddarpariaeth ar gyfer dysgwyr mwy abl a dawnus yn aml yn cael ei chyfyngu i waith y tu allan i oriau, fel darpariaeth wythnosol y sgwadiau ysgrifennu ar gyfer awduron ifanc abl iawn. Er bod y cyfleoedd hyn yn parhau i fod yn bwysig, nid ydynt yn gallu disodli cyfoethogiad ac ymestyniad y profiadau dysgu y mae angen iddynt ddigwydd bob dydd.
- 13 Mae angen i gynllunio ac addysgu ar draws y cwricwlwm gynrig her, dyfnder ac amrywiaeth o brofiadau ar gyfer dysgwyr mwy abl a dawnus. Dylai darparwyr wneud yn siŵr bod gwaith lefel uchel a beichus ar gyfer y dysgwyr hyn, yn enwedig trwy ddatblygu a chymhwyso medrau meddwl, technoleg gwybodaeth a chyfathrebu (TGCh) a medrau rhif ar draws y cwricwlwm<sup>3</sup>. Er y bydd ffocws ar 'ddysgu am ddysgu' yn berthnasol i bob dysgwr, bydd yr agwedd hon yn arbennig o fanteisiol i'r dysgwyr hynny sy'n fwy abl a dawnus.
- 14 Dylech fod yn ymwybodol o'r ffaith fod yn rhaid i nodi dysgwyr mwy abl a dawnus fod yn broses hyblyg sy'n cynnwys ystod o strategaethau, sy'n adlewyrchu'r ffordd ddynamig y gallai gallu a dawn amlygu eu hunain. Yn ei hanfod, mae hyn yn golygu y dylai darparwyr sicrhau bod y broses nodi yn barhaus a dylai osgoi asesiad 'unwaith ac am byth' o ddysgwyr.
- 15 Mae gwella safonau ym mhob maes addysg yn dibynnu'n hanfodol ar ansawdd arweinyddiaeth a rheolaeth. Un o nodweddion allweddol y darparwyr sy'n perfformio'n dda yw ansawdd gwaith arweinwyr a rheolwyr sydd â disgwyliadau uchel, yn sicrhau bod hyfforddiant cyfoes rheolaidd a pherthnasol ar gyfer ymarferwyr ac sy'n ymgymryd â monitro rheolaidd ac arfarnu trylwyr i wneud yn siŵr bod dysgu ac addysgu cystal ag y gallant fod i **bob** dysgwr.
- 16 Gallai'r llinellau ymholi nesaf helpu darparu gwybodaeth i gynorthwyo eich barnau am y safonau a gyflawnir gan ddysgwyr mwy abl a dawnus a'r ddarpariaeth ar gyfer eu datblygiad a chyrraedd safonau uchel.

**C** Sut mae'r darparwr yn diffinio dysgwyr mwy abl a dawnus?

**C** Pa mor dda y mae'r darparwr yn casglu, yn dadansoddi ac yn defnyddio ystod o ddata cyrhaeddiad, gan gynnwys data perfformiad mewn chwaraeon, cerddoriaeth a'r celfyddydau creadigol?

**C** Sut mae'r darparwr wedi cynnwys dysgwyr, llywodraethwyr a rhieni, lle bo'n briodol, wrth nodi potensial?

**C** A yw'r darparwr yn rhoi ystyriaeth briodol i faterion cyfle cyfartal ar gyfer pob grŵp o ddysgwyr, er enghraifft, trwy gynnwys dysgwyr abl sydd dan anfantais, y rheiny sydd ag anabledau a'r rheiny o grwpiau lleiafrifoedd ethnig?

<sup>3</sup> Fframwaith Sgiliau ar gyfer dysgwyr 3 i 19 oed 2008 Llywodraeth Cynulliad Cymru

- C** A yw'r broses o nodi dysgwyr mwy abl a dawnus yn hyblyg ac yn barhaus ac yn cynnwys ystod o strategaethau?
- C** Pa mor dda y mae'r darparwr yn defnyddio ystod o ddata i fonitro cynnydd pob dysgwr, gan gynnwys dysgwyr mwy abl a dawnus?
- C** Sut mae'r darparwr yn trefnu ei ddarpariaeth ar gyfer dysgwyr mwy abl a dawnus?
- C** A yw'r ddarpariaeth yn ddigon hyblyg a heriol i ddiwallu anghenion dysgwyr mwy abl a dawnus ac a yw ymarferwyr yn osgoi dulliau sy'n dibynnu ar ei gwneud yn ofynnol i'r dysgwyr hyn wneud mwy o'r un gwaith neu waith estynedig lefel is fel posau a chwisiau?
- C** A yw'r ddarpariaeth yn cynnwys cyfoethogi ac ymestyn yn y dosbarth yn ogystal â chyfluoedd ar gyfer dysgu y tu allan i'r ysgol?
- C** Pa mor dda y mae ymarferwyr yn ystyried gwahanol alluoedd ac anghenion dysgu dysgwyr ac a ydynt yn darparu cyfluoedd i ddatblygu medrau dysgu gradd uwch, medrau datrys problemau a medrau meddwl yn eu cynllunio a'u haddysgu?
- C** A oes ethos sy'n gosod disgwyliadau uchel ar gyfer pob dysgwr ac yn annog datblygiad emosiynol, cymdeithasol, corfforol a deallusol?
- C** A yw polisiau'r darparwr yn cefnogi arfer gyson ac effeithiol ar gyfer dysgwyr mwy abl a dawnus?
- C** A oes datblygiad staff i helpu ymarferwyr i ddatblygu eu harbenigedd eu hunain wrth nodi a diwallu anghenion dysgwyr mwy abl a dawnus?
- C** A yw ymarferwyr yn ymwybodol y gallai materion fel anfodlonrwydd guddio gallu uchel ac y gall cryfderau penodol dysgwr fod mewn meysydd datblygu anghonfensiynol?
- C** A oes gan y darparwr gysylltiadau gydag ysgolion, colegau, yr awdurdod lleol, asiantaethau allanol a sefydliadau eraill sy'n helpu ymestyn a chyfoethogi profiadau dysgwyr ymhellach?
- C** A yw dysgwyr yn cael mynediad at adnoddau addas, gan gynnwys technoleg gwybodaeth a chyfathrebu a ffynonellau ymchwil a gwybodaeth, sy'n ennyn diddordeb, yn herio ac yn ymestyn eu dysgu ac yn galluogi iddynt gyflawni eu potensial llawn?
- C** A yw llywodraethwyr yn ymwneud â sicrhau darpariaeth briodol ar gyfer dysgwyr mwy abl a dawnus?
- C** A yw polisiau'r darparwr a'r dysgu a'r addysgu yn cael eu monitro'n systematig a'u harfarnu'n drylwyr i sicrhau bod pob un o'r dysgwyr yn cyflawni eu potensial llawn?

## **5 Cyfeiriadau**

ACCAC (2003) Cwricwlwm o gyfle: datblygu potensial yn berfformiad

Estyn (2008) Arolygu Darpariaeth Addysgol ar gyfer Plant cyn yr Oedran Ysgol Gorfodol

Estyn (2008) Y Fframwaith Arolygu Cyffredin ar gyfer Addysg a Hyfforddiant yng Nghymru a'r Llawlyfr Arweiniad

Estyn (2002) Arweiniad ar arolygu amrywiaeth a chyfle cyfartal mewn ysgolion a lleoliadau'r blynyddoedd cynnar

Llywodraeth Cynulliad Cymru (2001) Y Wlad sy'n Dysgu

Llywodraeth Cynulliad Cymru (2004) Gweledigaeth ar Waith

Llywodraeth Cynulliad Cymru (2008) Cyflawni'r Her: Cylchlythyr Rhif 006/2008